

妙法蓮華經論優波提舍

元魏天竺三藏法師勒那摩提共僧朗等譯



清刻龍藏佛說法變相圖

妙法蓮華經論優波提舍卷上

論本內廣略俱備 虧五

大乘論師婆藪槃豆菩薩造

元魏天竺三藏法師勒那摩提共僧朗等譯

頂禮正覺海 淨法無為僧 為深利智者

開示毗伽典 祇虔牟尼尊 及菩薩聲聞

虧五

令法自他利 略出勒伽辯

歸命過去未來世 現在一切佛菩薩

弘慈降神力 願施我無畏 大悲止四魔

護菩提增長

序品第一

如是我聞一時婆伽婆佛住王舍城耆闍崛
山中與大比丘眾萬二千人俱皆是阿羅漢
諸漏已盡無復煩惱心得自在善得心解脫
善得慧解脫心善調伏人中大龍應作者作
所作已辦離諸重擔逮得已利盡諸有結善

得正智心解脫一切心得自在到第一彼岸
菩薩摩訶薩八萬人皆於阿耨多羅三藐三
菩提不退轉皆得陀羅尼大辯才樂說轉不
退法輪供養無量百千諸佛於諸佛所種諸
善根常爲諸佛之所稱歎以大慈悲而修身
心善入佛慧通達大智到於彼岸名稱普聞
無量世界能度無數百千衆生

釋曰此法門初第一品明七種功德成就應
知何等爲七一者序分成就二者衆成就三
者如來欲說法時至成就四者所依說法隨
順威儀住成就五者依止說因成就六者大
衆現前欲聞法成就七者文殊師利答成就
又序分成就者此法門中示現二種義成就
此義應知何等爲二一者一切諸法門中最
勝義成就故二者示現自在功德義成就故

如王舍城勝於諸餘一切城舍故耆闍崛山
勝餘諸山故顯此法最勝義故如經婆伽婆
佛住王舍城耆闍崛山中故

衆成就者有四種義成就示現應知何等爲
四一者數成就二者行成就三者攝功德成
就四者威儀如法住成就數成就者謂大衆
無數故行成就者有四種一者謂諸聲聞修
小乘行二者謂諸菩薩修大乘行三者謂諸
菩薩以神通自在力隨時示現能修行大乘
如毘陀婆羅菩薩等十六人具足菩薩不可
思議事而常能示現種種形相謂優婆塞優
婆夷比丘比丘尼等故四者出家聲聞人威
儀一定不同菩薩故
皆是阿羅漢等有十六句示現聲聞功德成
就故皆不退轉阿耨多羅三藐三菩提等者

有十三句示現菩薩功德成就故阿羅漢功德成就者彼十六句示現三種門攝義應知何等三種門一者上上起門二者總別相門三者攝取事門上上起門者謂諸漏已盡故名爲阿羅漢以心得自在故名爲諸漏已盡

以心無復煩惱故名爲心得自在以善得心解脫善得慧解脫故名爲心得自在以遠離能見所見故名爲無復煩惱以善得心解脫善得慧解脫故名爲心善調伏人中大龍者行諸惡道如平坦路無所拘礙應行者已行

三

應到處已到故應作者已作人中中大龍已得對治降伏煩惱怨敵故所作已辦者更不後生如相應事已成就故離諸重擔者以應作者作所作已辦後生重擔已捨離故逮得已逮利者已捨重擔證涅槃故盡諸有結者已逮

得已利斷諸煩惱因故善得正智心解脫者諸漏已盡故一切心得自在者善知見道修道智故到第一彼岸者善得正智心得解脫善得神通無諍三昧等諸功德故大阿羅漢等者心得自在到彼岸故衆所知識者諸王王子大臣人民帝釋天王梵天王等皆識知故又復聲聞菩薩佛等是勝智者彼勝智者皆悉善知是故名衆所知識總別相門者皆是阿羅漢等十六句等初句是總餘句別故皆是阿羅漢者彼阿羅漢名之爲應有十五種義應知何等十五一者應受飲食卧具供養恭敬等故二者應將大衆教化一切故三者應入聚落城邑等故四者應降伏諸外道等故五者應以智慧速觀察諸法故六者應不疾不遲說法如法相應不疲倦故七者應

靜坐空閑處飲食衣服一切資生不積不聚
少欲知足故八者應一向行善行不著諸禪
故九者應行空聖行故十者應行無相聖行
故十一者應行無願聖行故十二者應降伏
世間禪淨心故十三者應起諸通勝功德故
十四者應證第一義功德故十五者應如實
知同生諸衆得諸功德爲利益一切諸衆生
故攝取事門者此十五句攝取十種功德應
知示現可說果不可說果故何等爲十一者
攝取得功德二句示現如經諸漏已盡無復
煩惱故二者三句攝取諸功德一句降伏世
間功德如經心得自在故二句降伏出世間
學人功德如經善得心解脫善得慧解脫故
三者攝取不違功德隨順如來教行故如經
心善調伏故四者攝取勝功德如經人中大

對五

四

龍故五者攝取所應作勝功德所應作者謂
能依法供養恭敬尊重如來故如經應作者
作故六者攝取滿足功德滿足學地故如經
所作已辦故七者三句攝取過功德一者過
愛故二者過求命供養恭敬故三者過上下
界已過學地故如經離諸重擔故逮得已利
故盡諸有結故八者攝取上上功德如經善
得正智心解脫故九者攝取應作利益衆生
功德如經一切心得自在故十者攝取上首
功德如經到第一彼岸故
得諸菩薩功德成就者彼十三句功德二門
攝義示現應知何等二門一者上支下支門
二者攝取事門上支下支門者所謂總相別
相此義應知皆得阿耨多羅三藐三菩提不
退轉者是總相餘者是別相彼不退轉有十

對五

五

種示現應知何等爲十一者住聞法不退轉如經皆得陀羅尼故二者樂說不退轉如經大辯才樂說故三者說不退轉如經轉不退法輪故四者依止善知識不退轉以已身心業依色身攝取故如經供養無量百千諸佛故於諸佛所種諸善根故五者斷一切疑不退轉如經常爲諸佛之所稱歎故六者爲何等何等事說法入彼彼法不退轉如經以大慈悲而修身心故七者入一切智如實境界不退轉如經善入佛慧故八者依我空法空不退轉如經通達大智故九者入如實境界不退轉如經到於彼岸故十者應作所作住持不退轉如經名稱普聞無量世界能度無量百千衆生故攝取事門者示現諸菩薩住何等清淨地中因何等方便於何等境界中

應作所作故地清淨者八地以上三地無相行寂靜清淨故方便者有四種一者攝取妙法方便住持妙法以樂說力爲人說故二者攝取善知識方便以依善知識所作應作故三者攝取衆生方便以不捨衆生故四者攝取智方便以教化衆生令入彼智故又復更有攝取事門示現諸地攝取勝功德不同二乘功德故謂八地中無功用智不同上下故不同下功者下功用行不能動故不同上者上無相行不能動故自然而行故於九地中得勝進陀羅尼門具足四無礙自在智故於第十地中不退轉法輪得佛受位如轉輪王之太子故以得同攝功德義故攝功德成就者示現依何處依何心依何智依何等境界行依何等境界能辦故依何處者依善知識

故依何心者我依衆生心教化畢竟利益一切衆生故依何智者依三種智一者授記密智二者諸通智三者真實智依何等境界行依何等能辦者即三種智所攝應知威儀如法住成就者有四種示現何等爲四一者衆圍遶二者前後三者供養恭敬四者尊重讚歎如經爾時世尊四衆圍遶供養恭敬尊重讚歎故

如來欲說法時至成就者爲諸菩薩說大乘經故此大乘修多羅有十七種名顯示甚深功德應知何等十七云何顯示一名無量義經者成就字義故以此法門說彼甚深法妙境界法故彼甚深法妙境界者諸佛如來最勝境界故二名最勝修多羅者於三藏中最勝妙藏此法門中善成就故三名大方廣者

無量大乘門隨衆生根住持成就故四名教菩薩法者以爲教化根熟菩薩隨順法器善成就故五名佛所護念者依佛如來有此法故六名一切諸佛祕密法者此法甚深唯佛如來知故七名一切佛之藏者如來功德三昧之藏在此經故八名一切諸佛祕密處者以根未熟衆生等非受法器不授與故九名能生一切諸佛經者聞此法門能成諸佛大菩提故十名一切諸佛之道場者聞此法門能成諸佛阿耨多羅三藐三菩提非餘修多羅故十一名一切諸佛所轉法輪者以此法門能破一切諸障礙故十二名一切諸佛堅固舍利經者謂如來真如法身於此修多羅不敗壞故十三名一切諸佛大巧方便經者依此法門成大菩提已爲衆生說天人聲聞

辟支佛等諸善法故十四名說一乘經者以此法門顯示如來阿耨多羅三藐三菩提究竟之體彼二乘道非究竟故十五名第一義住者以此法門即是如來法身究竟住處故十六名妙法蓮華者有二種義何等爲二種一者出水義以不可盡出離小乘泥濁水故又復有義如彼蓮華出於泥水喻諸聲聞得入如來大衆中坐如諸菩薩坐蓮華上聞說如來無上智慧清淨境界得證如來深密藏故二華開義者以諸衆生於大乘中其心怯弱不能生信是故開示諸佛如來淨妙法身令生信心故十七名最上法門者攝成就故攝成就者攝取無量名句字身頻婆羅阿閼婆等舒盧迦偈故此十七句法門者是總餘句是別故如經爲諸菩薩說大乘經名無量

義如是等故

所依說法隨順威儀住成就者示現依何等法說法依三種法故一者依三昧成就故以三昧成就二種法示現何等爲二一者成就自在力身心不動故二者離一切諸障隨自在力故此自在力復有二種一者隨順衆生不見對治攝取覺菩提分法故二者爲對治無量世來堅執煩惱故如經佛說此經名已結跏趺坐入於無量義處三昧身心不動如是等故二依器世間三者依衆生世間震動世界及知過去無量劫事等故如經是時天雨曼陀羅華乃至歡欣合掌一心觀佛故依止說因成就者彼諸大衆現見異相不思議事大衆見已生希有心渴仰欲聞生如是念如來今者應爲我說故如來應爲我說

渴仰欲聞生希有心故名依止說因成就是故如來放大光明示現他方諸世界中種種諸事故先爲大衆示現外事六種震動等次爲示現此法門中內證甚深微密之法故又依器世間衆生世間數種種無量種種具足

煩惱差別具足清淨差別佛法弟子差別示現三寶故復乘差別有世界有佛有世界無佛今衆生見修行者未得果得道者已得果故如經諸修行得道者故數種種者示現種種觀故略說四種觀一者食二者聞法三者修行四者樂如經爾時佛放眉間白毫相光次第乃至以佛舍利起七寶塔故行菩薩道者教化衆生依四攝法方便攝取此義應知如經中說當自推取自此以下示現大衆現前欲聞法成就問一

人者多人欲聞生希有心是故唯問文殊師利如是示現世尊弟子隨順於法不相違故今佛世尊現神變相者爲何等義爲說大法故現大相以爲說因現大相者爲說妙法蓮華經故現大瑞相爲說如來所得妙法不可思議等文字章句故有二種法是故仰推文殊師利何等爲二一者現見諸法故二者離諸因緣唯自心成就彼法故示現種種諸瑞相者以爲示現彼彼事故如彼事相現沒住滅應知以文殊師利能記彼事故以文殊師利所作成就因果成就現見彼法故所作成就者此有二種一者功德成就二者智慧成就因成就者一切智成就又復有因謂緣因因成就者衆相具足也果成就者說大法也種種異佛國土者爲此示現彼國土中種種

異異差別應知淨妙國土者無煩惱衆生住處故如經照於東方萬大千世界乃至悉見彼佛國界莊嚴故如來爲上首者諸菩薩等依如來住故以彼如來於彼國土一切大衆中得自在故如經又見彼土現在諸佛如是等故

自此已下明聖者文殊師利菩薩以宿命智現見過去因相果相成就十種事如現在前是故能答彌勒云何現見過去因相者謂文殊師利自見已身曾於彼諸佛國土中處處修行種種行事故云何現見過去果相謂文殊師利自見已身是過去妙光菩薩於彼佛所聞此法門爲衆生說故成就十種事者何等爲十一者現見大義因成就二者現見世間文字章句甚深意因成就三者現見希

有因成就四者現見勝妙因成就五者現見受用大因成就六者現見攝取一切諸佛轉法輪因成就七者現見善堅實如來法輪因成就八者現見能進入因成就九者現見憶念因成就十者現見自身所經事因成就

大義因成就者八句示現應知一者欲論大法二者欲兩大法兩三者欲擊大法鼓四者欲建大法幢五者欲然大法炬六者欲吹大法螺七者欲不斷大法鼓八者欲說大法此八句欲示現如來欲論大法等故何者爲八種大義謂有疑者爲斷疑故已斷疑者增長淳熟彼智身故根熟者爲說二種微密境界一者謂聲聞密境界二者菩薩密境界大法鼓者二句示現以遠聞故入密境界者令進取上上清淨義故取上上清淨義者令彼進

取一切種智得現見故令彼進取一切種智得現見者爲一切法建立名字章句義故建立名字章句義者令入不可說證智轉法輪故現見世間名字章句意甚深因成就者如經我於過去諸佛曾見此瑞乃至故現斯瑞故現見希有因成就者以無量時不可得故不可思議不可稱不可量者示現過彼阿僧祇劫不可得故復示現五種劫一者夜二者晝三者月四者時五者年示現彼無量無邊劫故如經如過去無量無邊不可思議阿僧祇劫爾時有佛號日月燈明乃至令得阿耨多羅三藐三菩提成就一切種智故現見勝妙因成就者以示現諸佛及諸菩薩自受用示現故如經次復有佛亦名日月燈明乃至所說法初中後善故現見受用大

因成就者是時王子受勝妙樂各捨出家復彼大衆於爾許時不生疲倦心故如經其最後佛未出家時乃至佛授記已便於中夜入無餘涅槃故

現見攝取一切諸佛轉法輪因成就者法輪不斷故如經佛滅度後妙光菩薩持妙法蓮華經滿八十小劫爲人演說故現見善堅實如來法輪因成就者佛滅度後無量時說故如經日月燈明佛八子皆師妙光乃至皆令其堅固阿耨多羅三藐三菩提故

現見能進入因成就者彼諸王子得大菩提故如經是諸王子乃至皆成佛道故現見憶念因成就者爲他說法利益他故如經其最後成佛者名曰然燈乃至尊重讚歎故現見自身所經事因成就者以自身受勝妙樂故

如經彌勒當知乃至佛所護念故汝號求名者示現知彼過去事故復示現得彼法具足故自此已下示現所說法說因果相應知

方便品第二

經曰爾時世尊入甚深三昧正念不動以如實智觀從三昧安詳而起起已告舍利弗諸佛智慧甚深無量其智慧門難見難覺難知難解難入如來所證一切聲聞辟支佛等所不能知何以故舍利弗如來應正遍知已曾親近供養無量百千萬億那由他佛於諸佛所盡行諸佛所修阿耨多羅三藐三菩提法舍利弗如來已於無量百千萬億那由他劫勇猛精進所作成就名稱普聞舍利弗如來畢竟成就希有之法舍利弗難解之法如來能知舍利弗難解法者諸佛如來隨宜所說

意趣難解一切聲聞辟支佛所不能知何以故舍利弗諸佛如來自在說因成就故舍利弗如來成就種種方便種種知見種種念觀種種言詞舍利弗吾從成佛已來於彼彼處廣演言教無數方便引導衆生於諸著處令得解脫舍利弗如來知見方便到於彼岸舍利弗如來知見廣大深遠無障無礙力無所畏不共法根力菩提分禪定解脫三昧三摩跋提皆已具足舍利弗諸佛如來深入無際成就一切未曾有法舍利弗如來能種種分別巧說諸法言詞柔軟悅可衆心止舍利弗不須復說舍利弗佛所成就第一希有難解之法舍利弗唯佛與佛說法諸佛如來能知彼法究竟實相舍利弗唯佛如來知一切法舍利弗唯佛如來能說一切法何等法云何

法何似法何相法何體法何等云何何似何相何體如是等一切法如來現見非不現見論曰自此已下示現所說法因果相應知爾時世尊入甚深三昧正念不動以如實智觀從三昧安詳而起起已告舍利弗者示現如來得自在力故如來入定無能驚寤故何故唯告舍利弗不告餘聲聞等隨深智慧與如來相應故何不告諸菩薩者有五種義一者爲諸聲聞所應作事故二者爲諸聲聞迴趣向大菩提故三者護諸聲聞恐怯弱故四者爲令餘人善思念故五者爲諸聲聞不起所作已辦心故

智慧甚深無量故二者阿含甚深謂智慧門故言甚深者此是總相餘者是別相證甚深者有五種示現一者義甚深謂依何等義甚深故二者實體甚深三者內證甚深四者依止甚深五者無上甚深甚深者謂大菩提故大菩提者如來所證阿耨多羅三藐三菩提十四故又甚深者一切聲聞辟支佛所不能知故名甚深言智慧者謂一切種一切智智義故如經諸佛智慧甚深無量其智慧門難見難覺難知難解難入一切聲聞辟支佛所不能知故智慧門者謂說阿含義甚深者示現有八種一者受持讀誦甚深如經舍利弗如來應正遍知已曾親近供養無量百千萬億那由他佛故二者修行甚深如經於百千萬億那由他佛所盡行諸佛所修阿耨多羅三藐

三菩提法故三者果行甚深如經舍利弗如
來已於無量百千萬億那由他劫勇猛精進
所作成故四者增長功德心甚深如經名
稱普聞故五者快妙事心甚深如經舍利弗
如來畢竟成就希有之法故六者無上甚深
如經舍利弗難解之法如來能知故七者入
甚深入甚深者名字章句意難得故以自在
住持不同外道說因緣法名為甚深如經舍
利弗難解法者諸佛如來隨宜所說意趣難
解故八者不共聲聞辟支佛所作住持甚深
如經一切聲聞辟支佛等所不能知故

妙法蓮華經論優波提舍卷上

音釋

颯蒲末
切

妙法蓮華經論優波提舍卷下

論本內廣虧六略俱備

大乘論師婆數槃豆菩薩造

元魏天竺三藏法師勒那摩提共僧朗等譯

方便品之餘

如是已說妙法功德具已次說如來法師功德成就應知如經何以故舍利弗諸佛如來自在說因成就如來成就四種功德故能度衆生何等爲四一者住成就如經舍利弗如來成就種種方便故種種方便者謂從兜率天中還沒乃至示現入涅槃故二者教化成就如經種種知見故種種知見者示現染淨諸因故三者功德畢竟成就如經種種念觀故種種念觀者以說彼法成就因緣如法相應故四者說成就如經種種言辭故種種言辭者以四無礙智依何等何等名字章句隨

何等何等衆生能受爲說故復有義種種方便者示現外道邪法如是如是種種過失故示現諸佛正法如是如是種種功德故如經舍利弗吾從成佛已來廣演言教無數方便引導衆生於諸著處令得解脫故復無數方便者方便令入諸善法故復方便者斷諸疑故復方便者令入增上勝智故復方便者依四攝法攝取衆生令得解脫故言著者彼處處著或著界或著諸地或著分或著乘故著界者著欲色無色界故著地者著戒取三昧初禪定地乃至非非想及滅盡定地故著分者著在家出家分故著在家分者著已同類作種種業邪見等故著出家分者著名聞利養種種諸覺煩惱等故著乘者著聲聞乘菩薩乘故著聲聞乘者樂持小乘戒求須陀洹

斯陀含阿那含阿羅漢等故著大乘者著利
養供養恭敬等著分別觀種種法相乃至佛
地故

復種種知見者自身成就不可思議境界與
諸聲聞菩薩故如經舍利弗如來知見方便

卷六

到於彼岸故到彼岸者勝餘一切諸菩薩故
復種種念觀者如經舍利弗如來知見廣大
深遠無障無礙力無所畏不共法根力菩提
分禪定解脫三昧三摩跋提皆已具足故又
第一成就可化衆生依止善知識成就故第
二成就根熟衆生令得解脫故第三成就力
家得自在淨降伏故第四說成就者有七種
一者種種成就如經舍利弗諸佛如來深入
無際成就一切未曾有法故二者言語成就
得五種美妙音聲聞說法故如經如來能種

種分別巧說諸法言辭柔軟悅可衆心故三
者相成就如經止舍利弗不須復說故有法
器衆生心已滿足故四者堪成就一切可化
衆生皆知如來成就希有功德能說法故如
經舍利弗佛所成就第一希有難解之法故
五者無量種成就說不可盡如經舍利弗唯
佛與佛說法諸佛如來能知彼法究竟實相
故實相者謂如來藏法身之體不變義故六
者覺體成就如來所說一切諸法唯佛如來
自證得故如經舍利弗唯佛如來知一切法
故七者隨順衆生意爲說修行法成就彼法
何等如是等如經舍利弗唯佛如來能說一
切法故第一種種法門攝取衆生故第二令
不散亂住故第三令取故第四令得解脫故
第五令彼修行成就得對治法故第六能令

卷六

三

得修行進趣成就故第七令得修行不退失
故此七種法爲諸衆生自身所作成就故又
與教化令成就者與二種法令彼成就何等
爲二一與證法二與說法一與證法令成就
者謂依證法而授與故二與說法令成就者
謂依說法說與故此二種法如向前說依此
二種法有何次第而得修行即彼前文句再
說應知又依證法復有五種一者何等法二
者云何法三者何似法四者何相法五者何
體法故何等法者謂聲聞法辟支佛法諸佛
法故云何法者謂起種種諸事說故何似法
者依三種門得清淨故何相法者謂三種義
一相法故何體法者無二體故無二體者謂
無量乘唯一佛乘無二乘故又復有義何等
法者謂有爲法無爲法等云何法者謂因緣

法非因緣法等何似法者謂常法無常法如
是等何相法者謂生等三相法不生等三相
法何體法者謂五陰體非五陰體又何似法
者謂無常法有爲法因緣法又何相法者謂
可見相等法又何體法者謂五陰能取可取
以五陰是苦集體故又五陰者是道諦體故
復有異義依說法說法何等法者謂名句字
身故云何法者謂依如來所說法故何似法
者能教化可化衆生故何相法者依音聲取
故以依音聲取彼法故何體法者謂假名體
法相故

第六

自此已下依三種義示現一者決定義二者
疑義三者依何事疑義決定義者有聲聞方
便證得深法作決定心於聲聞道中得方便
涅槃證故如是二種證法示現有爲無爲法

故如經爾時大衆中有諸聲聞漏盡阿羅漢乃至亦得此法到於涅槃故言疑義者諸聲聞辟支佛等不能知故是故生疑如經而今不知是義所趣故依何事疑義者聞如來說聲聞解脫與我解脫不異是故謂生疑生疑者生因中疑此事云何此事云何云何如來數數說甚深境界前說甚深後說甚深不同聲聞以如是等是故生疑如經爾時舍利弗知四衆心疑乃至而說偈言故

自此已下依四種事說一者決定心二者因授記三者取授記四者與授記應知云何決定心已生驚怖者今斷驚怖爲利益二種人故是故如來有決定心此驚怖有五種應知一者損驚怖謂如聲聞取以爲實謗無大乘而作是言如來說言阿羅漢果究竟涅槃我

新六

五

畢竟取如是涅槃是故羅漢不入涅槃故二者多事驚怖以大乘衆生聞菩薩道劫數長遠種種苦行生如是心佛道長遠我無量無邊劫中行菩薩行久受勤苦如是念故生驚怖心起取異乘心故三者顛倒驚怖謂心分別有我我所身見諸不善法故四者心悔驚怖謂大德舍利弗等起如是心言我不應證如是小乘之法如是悔已心即自止即此悔心名爲念驚怖應知五者誑驚怖謂增上慢聲聞作如是心云何如來誑於我等故

因授記者如經止止舍利弗不須復說若說是事一切世間諸天人等皆生驚怖故此因授記皆生驚怖者有三種義一者欲令彼諸大衆推覓甚深境界故二者欲令彼諸大衆生尊重心畢竟欲聞如來說故三者爲欲令

增上慢聲聞離法座而去故第二請者示現過去無量諸佛教化衆生如經是會無數乃至聞佛所說則能敬信故第三請者示現現在佛教化衆生如經今此會中如我等比乃至長夜安隱多所饒益故取授記者以舍利弗等欲得授記如經佛告舍利弗汝以三請豈得不說汝今諦聽如是等故與授記者有六種應知一者未聞令聞二者說三者依何等義四者令住五者依法六者遮未聞令聞者如經舍利弗如是妙法諸佛如來時乃說之如優曇華如是等故

說者如經舍利弗我以無數方便種種因緣譬喻言詞演說諸法如是等故種種因緣者所謂三乘彼三乘者唯有名字章句言說非有實義故以彼實義不可說故

第六

六

依何等義者如經舍利弗諸佛世尊唯以一大事因緣故出現於世如是等故彼一大事者依四種義應知何等爲四一者無上義唯除如來一切義智智更無餘事如經欲開佛知見令衆生知得清淨故出現於世故佛知見者如來能證以如實知彼深義故二者同義以聲聞辟支佛法身平等故如經欲示衆生佛知見故出現於世故法身平等者佛性法身更無差別故三者不知義以一切聲聞辟支佛不知彼真實處故言不知真實處者不知究竟唯一佛乘故如經欲令衆生悟佛知見故出現於世四者爲令證不退轉地示現欲與無量智業故如經欲令衆生入佛知見故出現於世故又復示者爲諸菩薩有疑心者令知如實修行故又悟入者未發菩

提心者令發菩提心故已發心者令入法故
又復悟者令外道衆生覺悟故又復入者
令得聲聞小果者入大菩提故令住者如經
舍利弗但以一佛乘故爲衆生說法故依法
者如經舍利弗是過去諸佛以無量無數方
便種種譬喻第六因緣念觀方便說法是法皆爲
一佛乘故如是等故有譬喻者如依牛故得
有乳酪生酥熟酥乃至醍醐此五味中醍醐
爲第一小乘不如其猶如乳大乘爲最猶如
醍醐故此譬喻明大乘無上諸聲聞等亦同
大乘無上義故聲聞同者此中示現諸佛如
來法身之性同諸凡夫聲聞辟支佛等法身
平等無差別故此義皆是譬喻示現因緣之
義如向前說言念觀者於小乘諦中人無我
等於大乘諦中真如法界實際法界法性及

人無我法無我等種種觀故言方便者於小
乘中觀陰界入獸苦離苦得解脫故於大乘
中修諸波羅蜜以四攝法攝取自身他身利
益對治法故遮者如經舍利弗十方世界中
尚無二乘何況有三如是等故無二乘者無
二乘所得涅槃唯佛如來證大菩提究竟滿
足一切智慧名大涅槃非諸聲聞辟支佛等
有涅槃法唯一佛乘故一佛乘者依四種義
說應知如來依此六種授記是故前說何等
法云何法何似法何相法何體法如是示現
何等法者謂未曾聞故云何法者謂種種言
語譬喻說故何似法者所謂唯爲一大事故
何相法者爲隨衆生器說諸佛法故何體法
者所謂唯一乘體故一乘體者所謂諸佛如
來平等法身聲聞辟支佛乘非彼平等法身

之體以因緣果行觀不同故自此已下如來說法爲斷四種疑心應知何等四種一者疑何時說二者疑云何知是增上慢人三者疑云何堪說四者疑云何如來不成妄語何時說者諸佛如來於何等時起種種方便說法爲斷彼疑如經佛告舍利弗諸佛出於五濁惡世所謂劫濁等故云何知增上慢者如來不爲增上慢人說法云何知彼是增上慢爲斷彼疑故如經若有比丘實得阿羅漢者若不信是法無有是處等故云何堪說者從佛聞法而起謗心如來應是不堪說人云何如來不成不堪說法人爲斷此疑如經除佛滅度後現前無佛如是等故云何如來不成妄語者以如來先說法異今說法異云何如來不成妄語爲斷此疑故如經舍利弗汝等當

一心信解受持佛語諸佛如來言無虛妄無有餘乘唯一佛乘故乃至童子戲聚沙爲佛塔如是諸人等皆已成佛道者謂發菩提心行菩薩行者所作善根能證菩提非諸凡夫及決定聲聞未發菩提心者之所能得故如

是乃至小低頭等皆亦如是

譬喻品第三

舍利弗說偈

金色三十二 十力諸解脫 同共一法中

而不得此事 八十種妙好 十八不共法

如是等功德 而我皆已失

釋曰此偈示現何義尊者舍利弗自呵責身言我不見諸佛不往諸佛所及聞佛說法不供養恭敬諸佛無利益衆生事於未得法退是故尊者舍利弗作如是言呵責自身不見

者示現不見諸佛如來大人之相不生恭敬
供養心故往佛所者示現教化衆生力故放
金色光明者示現見佛自身異身獲得無量
功德故聞說法示現者能作利益一切衆生
故示現力者示現衆生有疑依十力斷彼疑
故供養者示現能教化衆生力故十八不共
法者示現遠離諸障礙故恭敬者示現出生
無量福德依如來教得解脫故以人無我法
無我一切諸佛法悉皆平等故是故舍利弗
自呵責身言我未得如是法故於未得中退
故自此已下次爲七種具足煩惱染性衆生
說七種譬喻對治七種增上慢心此義應知
又復次爲三種染慢無煩惱人三昧解脫見
等染慢對治此故說三平等此義應知何者
七種具足煩惱染性人一者求勢力人二者

求聲聞解脫人三者求大乘人四者有定人
五者無定人六者集功德人七者不集功德
人七種增上慢心者云何七種譬喻對治一
者顛倒求諸功德增上慢心以世間中諸煩
惱染熾然增上而求天人勝妙境界有漏果
報對治此故爲說火宅譬喻應知二者聲聞
人一向決定增上慢心自言我乘與如來乘
無差別故如是倒取對治此故說窮子譬喻
應知三者大乘人一向決定增上慢心起如
是意無別聲聞辟支佛乘如是顛倒取對治
此故爲說雲雨譬喻應知四者實無而謂有
增上慢人以有世間漏三昧三摩跋提實無
涅槃而生涅槃想如是倒取對治此故爲說
化城譬喻應知五者散亂增上慢心實無有
定過去雖有大乘善根而不覺知不覺知故

不求大乘於狹劣心中生虛妄解以爲第一
乘如是倒取對治此故爲說繫寶珠譬喻應
知六者有實功德人增上慢心聞佛說大乘
法而取非大乘如是倒取對治此故爲說輪
王解髻中明珠與之譬喻應知七者無實功
德增上慢人於第一乘不曾修集諸善根本
聞說第一乘心中不取以爲第一如是倒取
對治此故爲說醫師譬喻應知第一人者以
世間種種善根三昧功德方便令嬉戲然後
令入大涅槃故第二人者以三爲一令入大
乘故第三人者令知種種乘諸佛如來平等
說法隨諸衆生善根種子而生芽故第四人
者方便令入涅槃城故涅槃城者所謂諸禪
三昧城過彼城已然後令入大般涅槃城故
第五人者示其過去所有善根令憶念已然

第六

十一

後教令入三昧故第六人者說大乘法以此
法門同十地行滿諸佛如來密與授記故第
七人者根未淳熟爲令熟故示現得涅槃量
爲是義故如來說此七種譬喻何者三種無
煩惱人三種染慢所謂三種顛倒信故何等
爲三一者信種種乘異二者信世間涅槃異
三者信彼此身異爲對治此三種染慢故說
三種平等應知何者名三種平等云何對治
一者乘平等與聲聞授菩提記唯有大乘無
二乘故是乘平等無差別也二者世間涅槃
平等以多寶如來入於涅槃世間涅槃彼此
平等無差別故三者身平等多寶如來已入
涅槃復示現身自身他身法身平等無差別
故如是三種無煩惱人染慢之心現彼此身
所作差別以不知彼此佛性法身悉平等故

即彼人我證此法故彼人不得此法對治故
夢諸聲聞授記應知問曰彼聲聞等爲實成
佛故與授記爲不成佛與授記也若實成佛
者菩薩何故於無量劫修集無量種種功德
若不成佛者云何與之虛妄授記答曰彼聲
聞授記者得決定心非謂聲聞成就法性故
如來依三平等說一乘法故以如來法身與
彼聲聞法身平等無異故與授記非即具足
修行功德故是故菩薩功德具足諸聲聞人
功德未具足言授記者有六處示現五者如
來記一者菩薩記如來記者謂大德舍利弗
摩訶迦葉等衆所知識故名號不同故與別
記富樓那等五百人等千二百人等同一名
故俱時與記學無學等俱同一號又復非是
衆所知識故一時與記與提婆達多授記者

對六

十二

示現如來無怨惡故與比丘尼及諸天女授
佛記者示現女人在家出家修菩薩行者皆
證佛果故與授記菩薩授記者如下文不輕
菩薩品中示現應知禮拜讚歎作如是言我
不輕汝汝等皆當得作佛者示現諸衆生皆
有佛性故言聲聞人得授記者聲聞有四種
一者決定聲聞二者增上慢聲聞三者退菩
提心聲聞四者應化聲聞二種聲聞如來與
授記謂應化聲聞退已還發菩提心者若決
定者增上慢者二種聲聞根未熟故如來不
與授記應化聲聞是大菩薩與授記菩薩與
授記者方便令發菩提心故
又依何義者故如來說三乘名爲一乘依同
義故與諸聲聞大菩提記言同義者以如來
法身聲聞法身平等無差別故以諸聲聞辟

支佛異乘不同故有差別不以彼二乘非大乘故如來說言不離我身是無上義一切聲聞辟支佛等二乘法中不說此義以其不能如實解故是故諸菩薩等行菩薩行非爲虛妄無上義者餘殘修多羅明無上義無上義者略有十種應知何者爲十一者示現種子無上故說雨譬喻汝等所行是菩薩道者謂發菩提心退已還發者前所修行善根不滅同後得果故二者示現行無上故說大通知勝如來本事等故三者示現增長力無上故說商主譬喻四者示現令解無上故說繫寶珠譬喻五者示現清淨一切國土無上故示現多寶如來塔六者示現說無上故說髻中明珠譬喻七者示現教化衆生無上故地中涌出無量菩薩摩訶薩等故八者示現成大

第六

十三

菩提無上者示現三種佛菩提一者應化佛菩提隨所應見而爲示現故如經皆謂如來出釋氏宮去伽耶城不遠坐於道場得阿耨多羅三藐三菩提故二者示現報佛菩提十地行滿足得常涅槃證故如經善男子我實成佛已來無量無邊百千萬億那由他劫故三者示現法佛菩提謂如來藏性淨涅槃常恒清涼不變等義故如經如來如實知見三界之相乃至不如三界見於三界故三界相者謂衆生界即涅槃界不離衆生界有如來藏故無有生死若退若出者謂常恒清淨清涼不變義故亦無在世及滅度者謂如來藏眞如之體不即衆生界不離衆生界故非實非虛非如非異者謂離四種相有四種相者是無常故不如三界見三界者諸佛如來能

見能證真如法身凡夫不見故是故經言如來明見無錯謬故我本行菩薩道今猶未滿者以本願故衆生界未盡願非究竟故言未滿者非謂菩提不滿足故所成壽命復倍上數者此文示現如來常念善巧方便顯多數

第六

十四

過上數量不可數知故我淨土不毀而衆見燒盡者報佛如來真實淨土第一義諦之所攝故九者示現涅槃無上故說醫師譬喻十者示現勝妙力士無上故餘殘修多羅說應知多寶如來塔顯示一切佛土清淨者示現諸佛實相境界中種種諸寶間錯莊嚴故示現有八一者塔二者量三者略四者住持五者示現無量佛六者離穢七者多寶八者同一塔坐塔者示現如來舍利住持故量者方便示現一切佛國土清淨莊嚴是出世間清

淨無漏善根所生非是世間有漏善根之所生故略者示現多寶如來身一體示現攝取一切佛法身故住持者示現諸佛如來法身自在身力故示現無量佛者示現彼此所作諸業無差別故遠離穢不淨者示現一切佛

國土平等清淨故言多寶者示現一切諸佛國土同寶性故同一塔坐者示現化佛非化佛法佛報佛等皆爲成重大事故自此已下示現法力修行力應知法力者五種門示現一者證門二者信門三者供養門四者聞法門五者讀誦持說門第六四種門彌勒品中示現一法門常精進菩薩品中示現彌勒品中四種門者一者證門如經我說是如來壽命長遠時六百八十萬億那由他恒河沙等衆生得無生法忍故此言無生法忍者謂初地證智

十五

應知八生乃至一生得阿耨多羅三藐三菩提者謂證初地菩提故八生一生者謂諸凡夫決定能證初地歡喜地隨力隨分八生乃至一生皆證初地故此言阿耨多羅三藐三菩提者以離三界中分段生死隨分能見真如佛性名得菩提非謂究竟滿足如來方便涅槃也二信門者如經復有八世界微塵數衆生皆發阿耨多羅三藐三菩提心故三供養門者如經是諸菩薩摩訶薩得大法利時於虛空中雨曼陀羅華如是等故四聞法門者如隨喜品所說應知一淨故如經法門常精進菩薩品示現者謂讀誦解說書寫等得六根清淨故如經若善男子善女人受持法華經若讀若誦若解說若書寫是人當得八百眼功德乃至千二百意功德故此得六根

清淨者謂諸凡夫人以經力故得勝根用未入初地菩薩正位應知如經以父母所生清淨肉眼見於三千大千世界如是等又六根清淨者於一一根中悉能具足見色聞聲知香味覺觸法等諸根互用應知眼所見者聞香能知如經釋提桓因在勝殿上五欲娛樂乃至說法聞香知者此是智境以鼻根知故持力者有三種法門示現持力如法師品安樂行品勸持品等廣說法力如經應知其心決定知水必近者受持此經得佛性水成阿耨多羅三藐三菩提故修行力無上者五門示現一者說力二者行苦行力三者護衆生諸難力四者功德勝力五者護法力說力者有三種法門神力品中示現一者出廣長舌相者令憶念故二者謂警歎聲者說偈令聞

故令聞聲已如實修行不放逸故三者彈指令覺悟衆生令修行者得覺悟故行苦行力者藥王菩薩品示現教化衆生故又行苦行力者妙音菩薩品示現教化衆生故護衆生故護衆生諸難力者觀世音菩薩品陀羅尼品示現功德勝力者妙莊嚴王品示現二童子依過去世功德彼童子有如是力故護法力者普賢品及後品中示現又說言受持觀世音菩薩名號及受持六十二億恒河沙諸佛名號彼福德平等者有二種義一者信力故二者畢竟知故信力者有二種一者求我身如彼觀世音無異畢竟信故二者生恭敬心如彼功德我亦如是畢竟得故畢竟知者謂能決定知法界故言法界者名爲法性彼法性者名爲入初地菩薩能證入一切諸佛

卷六

十七

菩薩平等法身故平等身者謂眞如法身初地菩薩乃至證入是故受持六十二恒河沙等諸佛名號有能受持觀世音名號所得功德無差別

第一序品示現七種功德成就

第二方便品有五分示現破二明一餘品如向處分易解

妙法蓮華經論優波提舍卷下